

improbanda ; Imo hoc ipsum excitare debet diligentem animum, ut aliquando certum quid inveniatur, quo tuto se fundare possit, & adplicandum hic est, quod de *Babyloniorum scientia* monet Hieronymus, allegatus à Gratiano in can. 11. dist. 37. ibi : *Discunt, non ut sequantur, sed ut judicent, atque convincant : Quomodo si adversus Mathematicos quispiam velit scribere, imperitus Mathematicis.* Nec sine suo destituetur hæc cura, cum scientia rerum naturalium per se faciat ad culturam ingenii, & contemplatione infinitæ sapientiæ divinæ, quæ ex ipsa naturalium rerum inter se connexionem & indagata harmonia oritur, animus mirifice accendi possit, in admirationem arcanorum divinæ Majestatis, quæ in isto rerum ordine, atque inexplicabili siderum in res has sublunares correspondentia, abundanter elucet. Cum enim fundamentum hujus artis Genethliacæ, quod in siderum influxu consistit, negari plane non possit, non suppetit ratio, quare non permissum esse debeat, hujus causas, connexiones, & effectus penitus inquirere, & traditis hæctenus & per tot seculorum experientiam probatis regulis nonnullis uti, non quidem tanquam criterio infallibilis veritatis, aut demonstrationis cujusdam apodiecticæ, sed tanquam viam & excitemento ad inquirendam veritatem, quousque scilicet mens humana in arcana naturæ penetrare queat ; ita tamen, ut hæc omnis pervestigatio fiat cum devota reverentia erga divinum Numen.

Th. XXI,

*Additur
alia ratio
à pari.*

Si porro non improbamus *Judicia & Prognostica Medica, Moralia, Politica*, quibus homines periti & prudentes, de futuro morbi vitæque exitu, de fortunæ præcipitio, de Regnorum aut Regnantium flore aut cadentia, in futurum augurantur ; Quamquam stamina & terminus nostræ vitæ à Deo, & Regna ab altissimo Numine dependeant; tamen propterea, quod juxta regulas suas medicas,
mora-